


四明叢書

張宗祥



錢忠介公集卷五

契家後學全祖望編次

縣後學張壽鏞校補

正氣堂集五

樂府

海鶚行三章

天皖皖鬼斧剗眾星落巉巖一星突兀不肯服旁行匿
行作天眼

呼春春不回霜雪盈我鬢舊時相識人倏忽變蜉蝣高

岡有鳥字曰鳳海鷗海鷗與爾歸去來

精衛填東海中心豈不苦精衛飛來復飛去滄海知爾
心勸爾此行惜毛羽

西鳥夜飛補

客行動遠懷鳥飛渺何去寒色迴蒼蒼月照西陵樹據徐
柳臣萍鄉社詩選補

四言

壽吳伯寅七旬初度二章

洩雲在巔納氣於麓曜靈孕光咸池斯浴天地迴環以

守靈璞矧伊人斯而弗似續棄爾晝曦寶之夜燭荒爾
玉庭構其雲屋啖松柏脂求神仙錄公聞大笑朝茵晦
朔公之先人飛翔鸞鷟公之子姓森挺蘭玉公之腹笥
經史旁薄辭豐弗居施欲最足公乃泰然與心休沐紀
曆維山獻花維鹿

匪直也名理至則形公於處世不雕其生公於待物不
竭其情爲鄉三老爲國五更窘神者辱積精斯榮內意
爲將外身爲城將嚴令一城其焉傾冥心叩叩如聞天
聲敕公大年與福爲兄古之至人崆峒廣成得是道也

且爲前旌

勛柴集勲嗣君式穀二章

我行其野維黍油油穎粟載詠既有其秋弗耘弗耔以
遨以遊維草斯竊伊禽之差人謀弗臧天則曷仇
我瞻於山有木離離水土沃澤雨露潤滋旣大乃幹亦
豐而枝不搖不琢培斯植斯棟梁之望庶其企而

厲志

嗟余不造與窮爲宅衣結修容履穿視迹見富貴人朱
門赫奕偃僂循牆乃徐有適幸賴長者時相誚謫胡勿

跂予奮迅六翩胡甘卑棲自使局脊予謂之然厲心芸
籍今也皇哉得被康澤祖德所貽寧忍遽擲顧子寡昧
終鮮扶掖識疲照遠神乖應劇何以委蛇無玷宗祏何
以亢直毋負廉潔喟然言志庶竦愚魄

五言古

詠史十三首

并序

上古之世詩卽爲史及詩亡春秋作而詩史遂判
二流矣史以謹嚴立體詩以婉曲樹義然於以發
揚往烈扶助幽美激勸後人風厲來者其道一也

余不敏而爲吏偶以暇日讀史有得聊綴微旨遂
成歌詠或疑當今十室九空憂方不測長吏不先
人急而用微文自娛焉適於治不知古之爲詩者
采輯風謠獻之天子以知其民俗之貞淫好惡而
其長吏政治之得失繁簡又可知也隔閭千載斯
事遂廢毋怪乎以詩爲騷人墨客之孤徑矣昔七
子賦詩皆取裁前旨用抒心寄然其人之善敗與
其受之吉凶皆卒驗焉予旣無以發明詩史式訓
末俗徒以考鏡得失之意託於七子言詩之志庶

山鼠林猿聞其聲者可以知所感矣

茂陵有長者文學雄海隅初辭鄧氏命終上廣成模後
隊列歌舞前堂授生徒入座草詔書勿喉惜據圖榮華
會有盡名節委泥塗一念不慎旃萬古爲悲夫

外戚傾漢祚舉朝若聾聵盡爲子孫謀恐觸王氏怒帝
之親信臣造第通肺腑一言而喪邦誤國繇宰輔朱雲
發狂憤借劍誅逆虜斧鉞拜聖恩龍逢遊下土折檻旌
直臣何不殺張禹

買臣方貧賤負薪常苦飢行吟過道中其妻恥相依不

學鴻鵠貞戢翼雙飛飛遨遊雒陽道奏對吐珠璣拜爲
會稽守四牡行駢駢騎前呼來左右生光輝故妻止
道傍含淚徒噓歔感君山間意後乘載與歸

曼倩事武帝持論多不根玄宗柱下史放學淳于髡豈
爲長安米來遊金馬門辟戟止淫會裁書阻遊園惠文
今寂寞俳優直道存古來尙諷諫神仙何足論

昔有嵇中散含眞味道腴玩世同芻狗遺形等敝襦自
然龍鳳質故作山澤癯洗沐愁有待鍛鍊不爲劬求仙
止得癖養生適喪軀援琴顧日影悲風起城隅長松舊

遊處曾奏廣陵無

三國事爭戰羣策定雄雌武侯臥隆中淡然無所爲先
主一枉駕許身事驅馳遂建三分業不出隆中期涕泣
再上表祁山六出師功業雖不成天下皆壯之寂寥千
載後茫茫漢水悲

天子好文學長卿賦上林天子好封禪長卿有遺音臨
死更何求不獻規與箴試讀封禪書何如白頭吟

晉武旣云逝禍亂生中閨朝政繇賈氏玉座委癡兒有
位思鱸膾飢民食肉糜君臣盡如此天意那可爲會見

塵埃裏雒陽銅狄悲

清泉何瀰瀰白石何齒齒人跡所不到中以藏處士昔
者嚴子陵披裘入齊市漢武徵故人坦腹同臥起今夕
慰平生明朝勞太史客星豈久居翩然辭帝子遂歸富
春山垂釣從此始

始皇陵下石狐兔爲穴窟昔年事穿治辛苦驪山卒樹
草象山川冶金爲宮闕豈料牧豎焚火隨咸陽發南山
未云固何勞奉枯骨

火盛蛾之招翩然來相期隱侯博學子仕齊官不卑貪

立定策功垂老甘爲之足躡尙書履寧懷家令時流涕
覆卮酒俯席慙妓師此業已滔天千劫不可糜稽首白
上聖赤章將誰欺君子慎名節無勞仗佛慈

越國有好女浣紗溪水頭一自進吳國粉黛難與儔初
從馳馬埒終上采蓮舟臣自波濤泣君忘麋鹿遊夫差
輕社稷於妾亦何尤

君王自茲去銅雀何崔嵬雄心圖篡漢白日忽西摧欲
將未了緣續向銅雀臺朔望奏伎樂蕙帳誰爲開若令
壯士在魂魄應歸來

舟行十九首

井序

十九首者偶然而十九首耳意有所感感盡則止
以十九首終焉故名之曰十九首也時維舟矣塵
慮迸清虛生覺水石禽魚盡供片晌受用又如夢
魘之人方見鬼王獄卒獐獍萬狀中心悸悸如欲
狂又一境焉天日清空林木暢茂滌茶鑪以煮茗
拂素几而談玄雖等夢乎然而以爲樂矣詩中多
序胸中菀積或時多孤憤語非世俗所宜也然余
不敢以告夢中人而私以俟諸醒者若乃先哲徽

音後人所則謙讓不遑如聞諱忌而名篇之義偶
符於古是則余罪也夫

昔日登高處今朝問渡時茅屋數間在綠楊兩地垂行
人各有意不知忙爲誰去去莫復問行行心自悲

越王行樂處臺榭非當時明心照空樓寒鴉鳴故枝往
事誠可傷未知來者誰盛衰與消息天道有常期安知
百世後不仍臺與池前後總不見歎息徒爾爲

舟中何所見新苗長油油農夫勤耕穫乃亦自有秋豚
蹄向天祝勿生蝗與蝻縣官徵糧急勿得具乾饌稽首

更祝天詔書下九州明年減租稅寢食恆無憂

飛蟲問天地我命在何時扶搖出汙淖敢與雲霄期忽然投羅網羽翼不自持顧瞻華堂內芬芳盈羅帷眾夫欣有託我獨爲孤羈微聞相慰勞聲響細如絲天恩終浩蕩胡不救汝爲願得歸去來延頸望慈悲

局脊憂命促胡不學神仙神仙在雲闕有時居市廛終知四大假胡爲徒憂煎肝臂不自我蟲鼠聽於天解脫形象外山林在目前太華三百丈可以遊其巔滄海三萬頃可以飲其泉眾緣不敢犯泰宇靜以玄歸來復歸

來逍遙以永年

天地語飛蟲疏翼前聽詞蟻城尙羽獵人馬紛驅馳異
蜂被五采猶以鸞鳳欺汝於諸類中算數所不賁飄風
吹汝來得窺君王墀卽投羅網內不謂今無時苦樂朝
暮閒問天將奚爲但戒後來者出門慎所之

問此扁舟內胡然而有我明月滿前洲林閒笑聲嗟獨
有失路人愁雲橫窗鎖明日問舟子此處阿誰坐我識
縹緲峯未知峯幾朵欲乘風便去足下其許可

扁舟對我言予行不遇時昨日貴遊子泛舟挾麗姬臨

風一搦管斗酒百篇詩文史供宥佚山川窮指麾不意
載達官戚戚靡所施予舟厭酒肉恐見山靈嗤行當送
君返別尋輕薄兒

有鳥羣飛飛飛集何處不羨畫棟梁不羨玉堂署試
看呢喃燕含泥下沮洳雖得主人憐還將弱雛去春秋
能幾時離別一何遽相期歸舊棲毋勞弋人慮一枝巢
鷦鷯風雨亦見怨歸哉以歸哉莫爲情猶豫

河水清且漣舟行如鏡裏推窗看洲峙挽流滌其齒芳
草綠前汀沙禽戲水涘吾欲垂釣竿釣此尺半鯉但恐